

胡文忠公遺集

國史館本傳

胡林翼湖南益陽人道光十六年進士改庶吉士十八年散館授編修十九年

大考二等二十年充會試同考官八月充江南鄉試副考官以失察正考官文慶攜帶舉人熊少收入闈閱卷降一級調用二十一年丁父憂服滿改捐中書並捐陞知府二十六年十二月奉

旨分發貴州以知府用三十年八月署鎮遠府知府勦辦苗匪出力

賞戴花翎九月湖南逆匪李沅發竄貴州界林翼率勇勦捕

殆盡巡撫喬用遷上其功得

旨俟補缺後以道員用咸豐元年正月補黎平府知府二年八月粵匪由湖南竄武昌湖南巡撫張亮基請調林翼赴營差遣已奉

俞旨旋以貴州巡撫蔣霽遠奏稱黎平毘連楚粵防堵需人諭毋庸調赴湖南三年二月時張亮基署兩湖總督復偕署巡撫駱秉章合疏請調林翼襄辦軍務

上以林翼熟悉黔省情形調往他省轉恐人地未宜不允行十月御史王發桂疏稱林翼捕盜鋤奸有膽有識其平日訓練壯勇仿戚繼光成法而變通之勇不滿三

百銳健果敢一可當十搜剿匪徒於深林密箐中與士卒同甘苦所著保甲團練條約及團練必要諸篇經督撫錢板頒發各府州縣遵行均有成效歷任督撫深爲倚重聞該員現在由黔赴部引

見約計行抵楚省倘蒙

聖恩逾格畀以重任畱於湖北帶兵剿賊可期得力疏入命畱湖北交總督吳文鎔巡撫崇綸差遣委用四年三月擢貴東道時賊由黃州上竄岳州陷湘陰林翼率黔勇迎擊於喬口驛敗之

上以岳州爲咽喉重地

命在籍募勇之前任禮部侍郎曾國藩飭林翼斷賊後林翼  
駐軍通城之平江界戰於上塔市殲除無算四月武  
昌省城戒嚴林翼自通城赴援六月擢四川按察使  
命仍留湖北軍營隨同副將塔齊布辦理防剿七月湖南巡  
撫駱秉章奏岳州必須重兵防守湖南曾經戰陣之  
兵均已調赴湖北若林翼復行隨征則該郡無可倚  
恃得

旨岳州爲湖南門戶川黔藩籬逆賊屢經窺伺防範宜嚴且  
該處駐有重兵則曾國藩統師東下可無後顧之憂胡林  
翼著仍駐岳州毋庸隨往湖北賊旋竄常德林翼赴安化

搜捕會匪取道益陽我軍克復龍陽常德澧州八月調湖北按察使兼辦糧臺十月崇陽復陷林翼往剿賊竄通山督兵窮追斬擒甚多因率鄉紳舉行保甲團練不力者罪之地方賴以安十二月

欽差大臣曾國藩攻賊於九江

上念九江陸路兵單南北不能兼顧

諭林翼赴國藩軍營助剿林翼由瑞昌至南昌鋪扼九江之背與塔齊布併力攻東西二門毀其土城殺賊數百移營湖口攻南岸之梅家洲陣斬悍賊數十追殺四百餘名水師亦由外江進口攻內河擊沈賊船二十

餘隻僞將軍梁國安總制熊常易司馬許學受等悉就擒五年正月擢湖北布政使先是上年我軍紮湖口時逆首羅大綱亦距湖口十數里立營意圖抗拒林翼率二千人分紮要隘逼賊船入下游路已斷至是賊自姑塘屏風等處駕船出林翼偕畱營之浙江甯紹台道羅澤南夾攻焚其船遂圍梅家洲賊壘令兵勇各負土囊持火包鼓而前衝突鑽簇閒前者傷後者繼進已入數十人矣擲火人誤傷同入者負以出兵勇誤爲敗潰奔數里始整隊立復戰轉敗爲勝越日內河水師失利賊悉眾撲營併力堅守挫其鋒

而北岸賊已分股竄武漢總督楊需喪師於廣濟退  
守漢口賊竄襄陽需復遁德安林翼聞警率師回援  
會同水陸各軍攻漢陽力戰半日燒賊營四座方奪  
門入賊忽從城外抄襲軍稍卻轉攻西門由沌口下  
擊敗之三月賊自漢口攻壇角林翼擊之於白沙洲  
瞥見武昌火起亟赴援城已陷四更結筏潛師渡江  
規復省城次日賊四面環攻官兵食盡勢不支突圍  
而出駐營金口時武昌兩次淪陷兵勇潰敗殆盡林  
翼坐困金口前逼武昌羣寇後有崇通伏莽餉絕掘  
草根佐糧相持日久各處乞貸情詞深痛殘破之餘



十不一應乃發私家穀濟軍食士卒感動軍威稍振  
尋奉

命署巡撫統帶水陸各軍攻武漢楊需駐德安以賊北竄爲  
慮奏令林翼上扼漢川林翼上言荆襄據東南之形  
勝江漢爲荆襄之咽喉賊據漢陽北岸已形梗塞武  
昌復失南岸又被蔓延惟急攻武漢乃可內固荆襄  
臣已分兵進紮軍山遏賊上竄之路飭守備譚瓊林  
由紙坊驛攻武昌之背臣率兵循江岸攻武昌之南  
武昌復則南岸可次第肅清

詔嘉納之四月督隊分三路攻南岸賊營並派千總何紹彩

等攻白沙洲及江隄八步街等處賊眾悉銳抵拒戰  
小卻飾記名知府彭玉麟將江邊陸師趕回橫截自  
率水勇助戰紹彩等飛奔援應兩路橫衝追賊三百  
餘全數截殺其前路衝鋒悍賊亦經岸兵圍剿計殺  
黃衣賊目五斬首二百三十餘顆生擒僞總制伍大  
潰等二十六名奪獲器械無算賊謀襲金口營斷官  
軍餉道林翼飛馳金口分三路埋伏三路接戰親率  
大隊旋繞之殲賊七百餘生擒僞平湖丞相陳大爲  
等五月賊大股分六路來撲林翼派令千總周得魁  
等分路進剿連斃執大黃旗悍賊數名旋伏兵兩路

抄襲賊尾賊敗退紙坊屯紮我軍進擣其壘忽南風大起礮火齊發賊狂奔入城是役也殄賊千餘生擒及淹斃者無算解散脅從數千官軍直逼小東門於紙坊金口犄角立營賊伏不出林翼上言就武漢大勢而論進兵武昌必以洪山爲扼要武昌周二十里門八臣攻其一遺其七賊出城抗拒尙可力戰以成功堅伏不出則攻具未備運道難通幾成坐困此武昌實在情形也攻漢陽必於涇口蔡店屯重兵扼其犯襄河之路臣濬江隄以水軍扼其西又以水師橫出襄河之內外江內河彼此夾攻克復漢陽則咽喉

旨

通而武昌可復治鄂者以漢陽爲重亦形勢然也得  
突又言團練之効外可助官軍聲威內可弭宵小隱隱  
救時之策此爲先務惟團練爲治鄉之要與選吏選  
將相似州縣不得人則州縣壞營伍將領不得人則  
兵勇潰團練非正士良民爲之長則犯法抗糧攘奪  
爲亂鄉民以兵刃爲事不能躬親董勸旌別淑慝則  
目前之成效難期日後之流弊滋甚

上

其議七月由金口渡江以火龍船燬賊浮橋水陸合攻  
民勇接應遂克漢鎮林翼親冒矢石殺至龜山直攻  
高廟賊巢生擒僞軍師吳會元等又攻大別山敗之

進逼漢陽平其西面土城別遣兵攻克蔡店收復漢川搜捕餘匪殆盡德安之賊亦經派兵擊退疏入

上請其辦理得手尋以崇通股匪勾結武昌賊眾撲金口營署臬司李孟羣力戰四日眾寡不敵陸營失守

諭旨胡林翼與李孟羣素來用兵尙合機宜現雖兵勇潰散能重整隊伍不至頓挫軍威等因欽此林翼尋由漢陽移紮多山賊大股分路來撲餉絕兵潰損壞關防下部議處復由蔡家嶺移營大軍山收集潰勇駐紮新隄嘉魚時賊勢猖獗南北岸勢難兼顧羅澤南方帶兵搜捕義甯州餘匪林翼請調澤南赴鄂會剿

元之九月整軍復進飭澤南攻城克之賊竄崇陽派令知府李續賓率勇堵絕通山之路賊分路來撲我軍佯敗旋自山脊衝下四路截殺賊掘濠爲堅守計我軍分數十隊設伏二更時令敢戰士數百帶雲梯直撲賊壘拋火毬火箭伏勇齊出礮聲震山谷賊開北門遁焚燬及踏斃無算餘匪竄蒲圻復創之於羊樓洞逆首韋俊石達開自蒲圻來援林翼與澤南合剿焚賊營九座截殺五千餘遂克之賊復糾合興國大冶匪黨麇聚咸甯林翼飭澤南督兵躡追進至橋頭次日黎明乘大霧壓城縱火燒橋亭兵勇逼城下先登

殺賊數百立將咸甯克復乘勢進攻武昌時武昌城內出賊數千於五里街修木壘林翼澤南等分隊攻破之水師亦由六溪口拔營進賊驚潰林翼從紙坊移營李家橋督諸軍分路進攻殲賊多名澤南自洪山攻賽湖隄賊陷泥淖中被殲殆盡復分兵攻漢陽大破之於龜山尾湖隄等處礮船逼五顯廟燬賊艦及漢陽東西城外土壘武昌賊匿不出其鮎魚套賊船亦被擊沈於是武漢城外賊蹤幾盡疏言近年軍務籌餉難於將兵捐輸釐金爲軍需急務假手吏胥弊端百出昔唐臣劉晏言理財不用吏胥而用士類

誠爲得法惟是賦隲靡定求其不辭勞瘁不避艱險  
隨營辦事置身家於不問者實難其人臣自九江回  
省卽飭鄉紳等辦捐務均能實在出力使商民信服  
踴躍急公於軍務大有裨益報

聞十一月飭千總余雲龍等敗賊於江夏之梁子湖又敗之  
於金牛鎮六年正月遵

旨保舉人員奏言水師十餘營營官以總兵楊載福記名道  
金華府知府彭玉麟爲尤著併以儘先游擊李成謀  
鮑超二員身經百戰勇敢冠軍堪勝方鎮之任奏

聞三月率各路兵攻武昌乘勝追至城下羅澤南死之林翼



優卹

以澤南父年八旬子幼奏請

從之四月賊於漢陽江面排列戰船林翼令總兵楊載福等率火船直抵漢陽各門砍其木簰鐵練縱火燒之燬賊船二百餘隻延燒江岸賊壘賊另股由樊口竄出亦經派兵擊退自蘄州達九江軍聲大振其羊樓街黃土堡雙鳳山白楊橋等處之賊派令同知銜曾國華等擊斃無算五月賊復於武昌城外豹子澚築壘意圖掩襲林翼調集兵勇由茶棚分三路進剿賊分股抵拒並於官山高嶺繞道接應我軍奮擊敗之賊

旋於梁子湖濱停泊我兵渡麥門橋用火筒火箭延  
燒林木賊冒火遁船俱焚燬越日賊由東嶽廟鷹嘴  
閣出城分踞欲於小龜山抄襲擊敗之並圍攻南湖  
坪屯賊逼入沙湖淹斃無算其湖口援賊戰艦踞葛  
店林翼飭官軍從白許山繞擊三伏三起賊潰生擒  
僞將軍羅文元等陸軍亦於樊口分五路進西山雷  
山賊旗四布我軍登岸一呼賊悉逃竄敗之於魯家  
巷水師由沙口下駛燒斷樊口浮橋殲賊無算七月  
林翼偕李續宜分督兵勇擊退魯家巷援賊復飭楊  
載福瞿定國等攻賊橋焚其划船百餘生擒僞司馬

李光發等賊蠡擁出戰林翼飭李續宜嚴陣以待立  
斬衝鋒悍賊數名復派候補直隸州知州蔣益澧抄  
襲之時護軍參領舒保亦率馬隊於沙子嶺小龜山  
酣戰轟斃賊匪數百是日破魯家巷賊壘四毀東湖  
賊船七十餘隻燒賊巢八十餘處賊膽已喪八月節  
次平賊壘十九座殲斃無算旬日之內二十八戰解  
散脅從萬餘九月林翼令楊載福追賊至蘄州賊出  
拒我軍登岸誘敵潛令下游乘虛入城夾攻賊大潰  
官軍抵田家鎮焚賊船百八十餘隻燬其輜重十月  
添築武昌城外營壘四面環攻並令水師攻鮎魚套

分兵攻漢陽南岸觜參將王明山奮勇血戰焚賊船五十餘隻奪其舳板長龍無算賊船幾盡十一月林翼飭水師十三營分上下游夾擊將纜江鐵鎖砍毀賊勢窮洞開各門分七股來撲我兵奮力抵拒鏖戰三時士氣益奮賊狂奔官軍乘勝入城縱橫盪勦斃賊萬計生擒僞檢點古文新等十四人先鋒悍賊八百餘並逆黨五千立將省城克復疏入

諭曰此次逆賊負嵎日久經胡林翼激勵將士前後數十戰無不克捷遂將省城克復逆眾被殲淨盡自應立沛恩施以昭懋賞胡林翼著補授湖北巡撫並賞給頭品頂戴方

我軍入武昌時漢陽亦同時收復林翼隨飭水陸各軍分路進剿遊擊何紹彩由窯灣出東興州游擊張寅恭由雞窩出胡家墩李續賓由魯家巷出葛店各有斬獲其樊口賊爭先渡水浮橋已斷淹斃無算曾水師至奮力合剿遂復武昌縣城於是黃州興國大冶蘄水蘄州黃梅等處相繼收復生擒賊目辛成金等斬之七年正月攻小池口陣斬僞將軍劉松綢等破其壘生擒僞元勳檢點蕭逆等百餘時宿太逆匪上竄黃梅分兵攻破之三月飭候補道唐訓方等剿襄樊生擒逆首高先二等自率官兵踏平小池口賊

壘數十座四月克復英山五月九江悍賊率眾撲營親督各軍水陸夾攻敗之六月殲賊於黃岡之傅冢嶺八月皖匪分竄蕪黃並小池口與九江犄角仍圖窺伺武漢林翼率所部搜勦將黃梅後山賊壘踏平進逼小池口賊饋窮迫百八十里全楚肅清十月克復湖口以捐助軍餉

命加恩封贈三代正一品尋訪察興國州布衣萬斛泉等砥礪廉隅不求仕進奏請獎勵

詔賞萬斛泉七品頂帶宋鼎鄒金巢八品頂帶以示風勵八年四月率水陸各軍圍九江轟塌城垣百餘丈斃賊

萬六七千人復其城生擒僞貞天侯林啟榮僞元戎  
李興隆等寸磔梟示捷入

上嘉其調度有方

賞加太子少保銜五月太湖賊竄蘄州擊敗之賊復由英山  
糾眾數萬至敗之於彌陀寺六月奏請展緩

陛見

詔如所請七月丁母憂總督官文請照軍營例百日後仍署  
理巡撫

諭曰胡林翼自簡任以來時閱四載於吏治兵事均能實力  
講求現雖闔境肅清而大軍水陸東下進止機宜尙待調

度籌備餉需亦關緊要該撫現丁母憂著照軍營例穿孝百日加恩賞銀四百兩由湖北藩庫給發俾經理喪事百日後仍署理巡撫如扶柩回籍再行賞假兩月俟軍務完竣準其補行終制以遂孝思八月林翼奏稱扶柩回籍並懇請終制

諭曰楚境現雖肅清而賊氛未靖地方善後邊防事宜均關緊要胡林翼熟悉情形實心任事當此時事多艱正臣子力圖報效之日未可拘泥恆情致誤事機著仍遵前旨於假滿後署理湖北巡撫十一月李續賓覆軍於三河林翼以母喪歸未百日聞信卽遵



旨來鄂進駐黃州九年二月請調翰林院編修林汝舟戶部主事閻敬銘等隨營差遣

從之五月石達開圍湖南寶慶府城林翼飛飭李續宜星夜赴援解其圍追擊之八月皖逆盤踞石牌鎮造堅城與太湖賊接應林翼督兵進剿燬其木城越濠縱火生擒僞官霍天燕石廷玉等十年正月剿賊於潛山太湖相繼克之七月賊踞桐城林翼督官軍分路進賊出城來撲盡殲之並乘勝進攻水壘克木城數座九月捐廉濟餉得

旨查明子弟給予獎敘十一月攻霍山斬獲甚多賊竄退境

丙肅清旋以服闋屆期疏請在營釋服奉

上諭著實授湖北巡撫俟軍務完竣再行回籍補行終制十一年二月以恭遇

萬壽覃恩其承繼子年尙穉幼疏請推

恩貤封胞叔及外祖父母一品

封典

允之是月因病請假得

旨賞假一月在營調理四月賊竄黃州林翼以駐紮太湖未

能兼顧自請議處

詔寬免之時官軍攻安慶急逆首陳玉成率眾來援於赤岡

嶺創壘四林翼飭我軍由集賢關進逼踏平之旋以  
賊竄羅田松子關並分陷德安隨州等處未能先事  
豫防

詔下部議處六月率師回援鄂省復請

賞假兩月

允之八月奏病勢增劇懇請開缺得

旨著再賞假兩月在署安心調理毋庸開缺先是湖南巡  
撫駱秉章奉

旨督辦四川軍務保稱在籍候選知縣劉蓉才優識卓熟悉  
戎務帶往四川差委至是

上問林翼如何錄用奏言該員器識遠大兼知兵事昇以封疆藩臬之任可期不負職守八月官文會國藩克復安慶省城並分兵收復桐城宿松等縣奏入

上以林翼首先畫策親身督勦厥功甚偉

賞加太子太保銜並騎都尉世職尋卒遺摺上

諭曰胡林翼秉性忠直操守廉潔由翰林厯官府道仰荷皇考大行皇帝特達之知於咸豐三年調赴湖北軍營晉擢巡撫賞頭品頂戴太子少保銜在軍營九年賞罰嚴明知人善任克復武昌及沿江郡縣肅清楚境並調遣官軍攻復江西九江軍威丕振所向克捷八月克復安慶

朕念其公忠體國懋著勛勞賞加太子太保銜並騎都尉世職方冀長資倚畀克奏膚功乃以積勞成疾甫經賞假遽聞溘逝披覽遺章實深悼惜著追贈總督卽照總督例賜卹任內一切處分悉予開復應得卹典該衙門察例具奏並加恩入祀賢良祠於湖北及湖南原籍建立專祠伊子胡子助侯及歲時由吏部帶領引見以示篤念蓋臣至意十一月曾國藩奏胡林翼蒙

先皇帝特達之知擢湖北巡撫當武漢兩次失陷湖北大半淪沒林翼坐困金口洪山一帶不特兵餉俱無亦且無官無幕厥後克復武昌以次恢復黃州論者謂鄂

撫可息肩矣林翼不爲自固之計越境攻九江分兵  
救瑞州督撫之以全力援鄰封自湖北始九江相持  
年餘中閒石達開自江西窺鄂陳玉成自皖北犯者  
三林翼終不撤九江之圍以回救卒復九江爲東南  
一大轉機功甫蒞卽以全力圖皖北嗣因李續賓覆  
兵於三河林翼居母喪聞信卽起赴鄂論者謂良將  
新逝元氣未復但保吾圉不宜兼顧林翼不然卽派  
重兵越二千里解湖南寶慶之圍援湘之師未反復  
議大舉圖皖繪圖數十紙分致臣與官文及諸路將  
領遂定攻安慶之策親駐太湖督勦本年回援鄂省

病中寄書縷陳勿撤皖圍力勦援賊之策故安慶之克臣推林翼首功也近世將材湖北最多如塔齊布羅澤南李續賓都興阿多隆阿李續宜楊載福彭玉麟鮑超等林翼均以國士相待或分資財惠其家室或寄珍羞慰其父母前敵諸軍求餉求援急蹙經營夜行繼日自七年來捷報皆不具奏奏則盛稱諸將功而已不與其心兢兢以扶植忠良爲務外省稱楚師和協如骨肉而於林翼之苦心調護或不盡知此臣自愧昔之不逮又慮後此之難繼者也軍興各省慮餉湖北三次失陷百物蕩然窮窘極矣自荊州捐

鹽各府抽釐稍足自存林翼綜核之才冠絕一時每  
於理財之中暗寓察吏之法三年部議漕米變價州  
縣照例浮收加至數倍上下交困林翼於七年創議  
減漕嚴裁冗費

先帝謂其不顧情面祛百年之積弊甚屬可嘉統計每年爲  
民間省錢糧百四十餘萬串爲帑項增四十二萬兩  
節省提存銀三十一萬餘兩利

國利民不利中飽之蠹向來衙門陋規革除淨盡州縣  
亦不準借催科政拙之名爲猾吏肥私之地各卡委  
員時勤訓課謂取民贍軍使商賈同仇卽以教忠多



入少出使局員潔已卽以興廉以湖北瘠區養兵六  
萬月費至四十萬之多而商民不散吏治日懋又皆  
精心默運非操切之術所得與也頃八月以來安慶  
克復江鄂肅清方幸全局振興可長驅東下不圖大  
功未竟長城遽頽臣與故撫其事日久相知最深咸  
豐四年曾奏林翼才勝臣百倍近年遇事咨詢尤服  
其進德之猛不敢阿好溢美亦不敢沒其忠勛謹將  
以死勤事情狀據實瀆陳乞

宣付國史館

諭曰已故湖北巡撫胡林翼由翰林起官仰荷

皇考大行皇帝特擢封圻戮力疆場勛勞懋著本年秋間積勞病故業經加封追贈以褒忠藎茲據奏稱胡林翼自擢鄂撫數載以來恢復本境援剿鄰封整軍經武以死勤事綜其生平功業允宜亟予表揚著卽宣付史館以光簡冊林翼之子胡子勛著賞給舉人一體會試以示褒獎藎臣至意同治元年復

諭曰湖北巡撫胡林翼未收全功遽就溘逝蹟其功勛卓越名播寰區至今江鄂士民猶能稱頌沒於王事憫念良深著賜祭二壇並著原籍督撫派員前往該員家祠賜祭

子諡文忠子胡子勛

欽賜舉人襲騎都尉世職

胡文忠公本傳全

胡文忠公行狀

湘陰 郭嵩燾纂

公姓胡氏諱林翼字貺生號潤之湖南長沙府益陽縣人世居十九里泉交河長岡村始祖漢清元武宗時由江西泰和遷湖南之甯鄉麥田數傳至思敬徙益陽又八傳曰光璧者明末從蔡忠烈公道憲守長沙殉難無子以姪柳溪諱其輟爲嗣四傳至公高祖諱民典事親以孝聞著孝經義疏行世曾祖諱多吉妣氏楊祖諱顯韶庠生著有紫筠園詩文若干卷妣氏湯繼妣氏劉父諱達源嘉慶己卯一甲三名進士

官詹事府少詹事妣氏湯以公貴三代皆

贈光祿

大夫妣皆一品夫人公甫襁褓詹事公以優貢試

京兆大父光祿公授公章句聰穎絕倫喜曰是子必  
成大器九歲省詹事公京師卽授以儒先性理之書  
而公少負才氣不甚措思也爲文操筆立就旁通曲  
暢自達其志道光乙未以附生舉本省鄉試明年成  
進士改庶吉士戊戌散館授編修明年充國史館協  
修庚子分校會試其年秋副文文端公慶典江南鄉  
試因事例降一級調用明年奉詹事公諱歸里服闋  
援例爲內閣中書旋捐知府分發貴州署安順府事

道光之季寇亂漸萌嶺嶠以南駱越滇黔諸山中奸  
宄亡命狐嘯梟嘯四出劫掠勾結營兵胥役爲黨羽  
無敢捕治安順宋之普里部也當雲南驛路向有冒  
頂大五小五諸匪聚眾爲姦暴公廉得其狀延訪士  
紳寄以耳目簡捕役之愿者行輒以自隨偵知賊黨  
以歲盡釀飲某所除夕方會燕署中忽起更衣疾率  
健捕馳至其地掩獲知名渠魁黃老廣余饒貴等其  
黨無一脫者在安順年餘先後擒巨盜三百餘名一  
郡肅然安順依山爲城舊有小溪貫城中歲久湮塞  
汲者負甕出郭十餘里始得水公疏濬溪道鑿泉築

溺以時蓄泄人得甘飲在郡日坐堂皇訟牒至立與  
剖斷清積案至三百餘牘人自以爲不冤倡修義學  
十數區搜輯節孝八百餘人彙報請旌建總坊通衢  
稟裁書吏規費安順二百年有司詳報節孝自公始  
調署鎮遠府府境跨有撫沅所屬皆苗獠其台拱清  
江黃平皆盜藪勢尤橫公治之如安順盜幾盡歲饑  
開倉平糶清社倉之被侵蝕者民賴以生奉檄帶兵  
勦黃平革夷山丙沙邦等處苗匪獲盜首保鵞等三  
百餘名悉平其寨以勦匪功奉

旨留貴州以知府不論繁簡遇缺卽補並

賞戴花翎會湖南新甯奸民李沅發爲亂戕官據城公奉委  
赴黎平防堵事竣奉

旨補缺後以道員用

文宗顯皇帝卽位

詔大臣舉司道以下可大任者雲貴總督吳文節公文鎔貴  
州巡撫喬公用遷皆以公名應旋署思南府事咸豐  
元年補黎平府府境毗連湖南粵西山深箐密盜出  
沒剽奪捕之輒越境竄匿公至日延紳民及椎結左  
稚諸渠率賜以酒食詳詢民情地勢令相連爲堡擇  
立鄉正團長牌長互相稽覈捕治諸不法者是時廣



西賊大起永甯懷遠融縣環黎平西南界皆賊公募壯勇擇隘防堵乃請委員今貴州巡撫韓公超操練勇丁張公禮度舉保甲冊籍以辦團練修建礮堡連屯相望上言督撫請環邊要隘築堡守禦以爲言戰不如言守用兵不如用民用民力以自衛不如先用地利以衛民郡城故無儲積勸諭富民捐穀置倉以備城守自後黎平變爲苗粵諸匪攻撲而城卒不可拔皆公練勇儲聚力也三年秋襲安榔匪滋事以抗糧爲名公以計解散脅從而誅其首犯劉瞎麼餘匪悉定先是粵逆出永安犯桂林道榔桂茶攸犯長沙

東下湖南巡撫張公亮基調公辦理軍務黔撫以公  
規辦黔匪事關全省大局奏畱之至是吳文節公由  
雲貴總督調任湖廣仍調公帶勇來楚辦理軍務四  
年春奉

旨補授貴東道公以黔勇千人行次通城而吳公已戰沒黃  
州賊遂陷漢陽以舟師上犯陷岳州湘陰甯鄉徑趨  
湘潭湖南巡撫駱公秉章調公回援省城會塔忠武  
公齊布今提督楊公載福侍郎彭公玉麟已破賊湘  
潭而安化土匪黃國旭等乘機抗糧爲亂檄公往捕  
公計擒之民皆安堵如故而賊之敗於湘潭者悉所

掠舟趨常德公以所部赴勦尋授四川臬司仍留湖南軍營辦理防勦事務是年今協揆曾公國藩大治水陸之師東征公從下岳州巡撫駱公奏請免隨東下仍駐岳州搜勦崇陽通城等處餘匪奉

旨調任湖北臬司秋曾公復武漢破田家鎮進圍九江調公

曾討公因自咸甯蒲圻大冶興國東出瑞昌與羅忠節公澤南勦賊湖口之梅家洲五年春湖廣總督楊公需之師潰於黃梅賊悉眾上竄公請於曾公以所部千餘人回援武昌別以副將王國才一軍隸之未至漢陽已失公先以軍營沌口檄國才軍由南岸徑

趨武昌會授湖北藩司甫半日城陷國才至偵得城  
賊暗號卽夜遣驍將詐爲賊裝賺入城殺賊目數十  
城幾復天曙賊聚益眾公倉卒不能濟師乃令國才  
退營金口與今侍郎彭公水師相倚扼賊使不得上  
犯旋奉

旨署理

湖北巡撫時武漢黃州德安皆爲賊踞公私塗炭無  
所措手公意不攻漢陽則荆襄梗塞不攻武昌則咸  
蒲崇通愈形滋蔓添募兵勇兼顧南北兩岸大小百  
餘戰亦屢瀕於危六月攻漢口復之單騎率親兵奪  
大別山賊卡未克會賊別股由漢川至焚漢口公軍

已一月不得食至麥山饑潰不數日整軍復戰其時  
水陸萬人多新募不習戰事賊至常數萬諸將見者  
奪氣公從容談笑沈密堅定雖挫而其氣彌厲振拔  
人才以忠義相感發所收裨將亦漸多勇敢能軍者  
州縣殘破餉源絕文移指撥多不時應爲書告鄰省  
求助沈摯悱惻人感其誠稍資濟之是年秋羅忠節  
公破賊江西之義甯州以武昌居天下衝長江險要  
所必爭上言曾公請赴援曾公以塔公舊部彭三元  
普承堯等軍佐之連克通城崇陽蒲圻咸甯公親會  
羅公軍於蒲圻並力擊賊平其壘因偕回金口與今

提督楊公議水陸進攻之策於是公率所部及普公承堯今方伯唐公訓方諸營由中路出省城之南駐營隄上羅公由東路駐營洪山南岡畱九谿營兵駐金口護水師以當西路自是武昌以南無賊蹤而督帥官公以吉林精騎合眾軍營北岸餉道日通軍勢亦日振六年三月羅公以攻城傷卒時與賊相持急日夜搏戰不少休而軍中新失大帥公撫循溫卹與故浙江布政使李忠武公續賓整飭其軍而簡練之氣益壯先是悍賊石達開由崇陽入江西連陷瑞州臨江又南山吉安東趨撫州建昌江西郡縣無一完

者屢告急請援羅公一意規復武漢不暇應至是公  
念江西方急而武昌猝不可復乃遣劉騰鴻普承堯  
出瑞州應援而令曾公弟諡忠愍曰國華者統其軍  
軍糧並資給焉五月九江賊古隆賢領萬眾由葛店  
油坊嶺入角嶺後路援武昌約城賊舉火爲識夾攻  
我營公謀知之陽爲賊火城賊果出撲伏發奮擊殲  
除殆盡乘援賊初至遣兵連夜薄之賊敗走七月石  
達開又自金陵上拔號稱十萬公分派水陸力戰制  
軍官公亦自江北遣都統舒保公領馬隊來助大破  
之追逐百餘里會襄陽土匪起連陷樊城穀城光化

竹山興山遂與川匪合陷宜昌公遣都統舒保公今  
方伯唐公合數營往平之有議撫者公卒不以爲然  
而事亦遂定時武昌賊窘公先與李忠武公於塘角  
舊灣洪山青山等處掘長濠濠墻修長城自羊橋直  
達江邊築壘安礮臺圍守魯家巷花園五里墩石觜  
亦如之城賊不得出援賊不得入我軍安坐以待賊  
糧之盡以十一月克復省城奉

旨賞加頭品頂戴實授巡撫遂分兵收復武黃各縣屬餘賊  
遁入九江北岸之小池口公計江楚唇齒相倚而九  
江扼長江之衝實江楚門戶九江一日不復江楚一



日不得安枕乃令李忠武公以全部精銳圍之分兵屯駐黃梅廣濟蘄州閒以遏江北之賊而公自駐武昌調度當是時官私廬舍焚燬幾盡諸事草創民物凋殘公一意振興裁通省浮勇以節糜費設武漢重兵以固根本嚴查保甲以除奸匪慎選賢員以資蘇息設清查局查被賊後州縣倉庫錢糧交代設節義局表章厯年殉難官紳士女設軍需局籌備東征軍士器械餉糈提綱維巨細畢舉尤以亂民之生由法度廢弛吏敝民媮因循苟且以有今日不務討賊則亂之流不塞不務察吏則亂之源不清劾參鎮道

府廳以下數十員與屬吏更始禁應酬嚴奔競崇樸  
實黜浮華於是在官者稍稍推廉尙能知吏事矣今  
大學士官公總督兩湖司軍事公推誠委心諮商籌  
度官公亦深相倚重無疑忌得盡所爲今將軍都興  
阿公多隆阿公都統舒保公皆領馬隊兵隸官公號  
驍勇善戰公見卽傾身與之接交無不樂爲用者其  
籌餉有三曰錢糧曰鹽課曰貨稅湖北漕政久敝官  
民交困道光中葉以還徵收常不滿半公三次奏減  
章程民以是輸將足額湖廣兩省自淮鹽阻絕率食  
川鹽公分置課鹽局於宜昌沙市又推行武穴老河

口等處視向來額課過之用故侍郎雷公以誠奏行釐稅之議設局各府縣市鎮仿劉晏用士人之法嚴杜中飽收支覈實自是湖北兵與餉強天下七年悍賊陳玉成自皖北上犯蘄州諸營敗潰賊徑趨蘄水武昌大震公急渡江赴黃州收潰卒得數千人而賊眾至十餘萬環踞巴河以東百餘壁亘數十里時巴水大漲惟三台河有石橋可通公念賊渡河則勢蔓延急派千人斷橋扼河以守而潛師出迴龍山遏其上竄調今安徽巡撫李公續宜以南勇由瑞州馳至督諸軍合擊於孫家背馬家河月山等處賊大敗狂

奔出境斬廣肅清都興阿公李忠武公亦連破黃岡之賊公視師九江定方畧還省提督楊公會諸軍奪小池口僞城次第收復湖口彭澤東流各縣九江之勢遂孤塹長濠圍之八年四月李忠武公穴九江城發地雷破之賊首林啟榮竊據四年餘塔忠武羅忠節屢攻不下至是乃悉滅之

先皇帝以公調度功多

賈加太子少保賊旋由六霍商城陷羅田麻城黃安遣兵分道擊之復其城公以九江旣復賊所扼長江險要獨有安慶奏請敷路進攻提督楊公以水師出江面將

軍都公由宿松望江逼安慶城爲圍師李忠武公規復太湖潛山桐城與都公犄角會廬州失陷北路請援急李忠武公奉

朝旨催促遂分營畱守舒桐自提五千人赴援軍次三河賊四面麕集力竭戰沒全軍陷覆公時丁母湯太夫人憂回籍懇請終制將軍都公以三河之敗由公去軍無調度應急起復公督師總督官公亦疏請公聞

命痛哭啟行徑次黃州時各軍退保黃梅人心惶惶聞公至皆以手加額自壯九年二月進營上巴河與今巡撫李公整飭部伍日夜訓練謀大舉會石達開由江西

南贛犯湖南掠郴桂而西趨寶慶號稱六十萬湖南告急公命李公率所部往援而以都統舒保公馬隊三百佐之又以水師二營佐湖南水師分扼諸河道湖北精兵援湖南者幾半寶慶之圍速解公之力也已而協揆曾公由江西奉入川之

命總督官

公奏請與公並力圖皖乃定四路進兵之策曾公循江而下爲第一路多公與今提督鮑公超攻取潛山太湖爲第二路公出英山霍山爲第三路李公由松子關出商城固始爲第四路議者以鄂撫應駐黃州不宜出境公謂我奪情起復不赴前敵討賊則此

出爲無名十月移營英山時太湖圍師方集逆首陳  
玉成來援眾數十萬多公鮑公及今方伯唐公觀察  
蔣公凝學悉力拒戰賊來日眾圍鮑公營數重聲息  
不通公調金觀察國琛以八千人自松子關躡英山  
踰潛山之天堂橫出冒大雪憑高築壘衷賊師而陳  
賊闖見之大懼而曾公亦自宿松遣師來會十年春  
合擊賊於小池驛大破之遂復潛太命諸將分下會  
欽差大臣江甯將軍和春公之師潰於金陵蘇常盡失曾  
公授兩江總督攜鮑公渡江次祁門謀經理徽甯以  
爲規復蘇常之本乃以其弟今江蘇布政使曾公國

荃圍安慶多公圍桐城李公駐青草塢爲兩軍援地  
廣軍分而將軍都公又奉

旨赴援

淮陽兵糧取給公悉力經畫問兵事曰惟我任問餉

事曰於我取一無所諉於人十月多公李公大破援  
賊於挂車河公忿安慶久不下自英山移營太湖就  
近部署度賊援皖不利必謀深入腹地以牽動諸軍  
於潛桐舒霍山險建立礮卡守以民兵命余副將際  
昌屯霍山樂兒嶺以防中路成總鎮大吉屯羅田松  
子關以防北路戒以賊至勿浪戰堅壁穩守待援十  
一年二月賊果糾合捻匪由六安霍山分路西犯成



總鎮破之松子關殲其魁龔瞎子霍山守者違節度  
戰敗軍潰賊取其旂幟陷黃州德安孝感隨州公策  
賊西竄注意在解皖圍皖圍一解則大勢全去墮賊  
計非宜乃定策遣李公回援而圍皖益急賊復分股  
回畧蘄州蘄水黃梅廣濟以趨安慶約城賊夾擊精  
悍皆聚公檄成總鎮下援曾公亦從南岸遣鮑軍門  
來破賊集賢關剗平赤岡嶺賊壘四座悍賊數千悉  
擒斬之磔逆首劉瑄林而援賊之由桐城來者又連  
爲多公所殪益安慶爲金陵屏障久陷賊中其渠魁  
僞英王陳玉成據爲老巢室家在焉故救之不遺餘

力及見我懷桐潛太之師皆屹然不動鄂疆雖暫被擾而黨分力弱兇悍被殲城中糧已垂盡勢大蹙適南岸賊復由武甯義甯內犯興國大冶南及崇通省城岌岌公病嘔血憊甚率師回援而皖圍終不解既抵省南岸之賊聞風遁八月朔遂克安慶會公以力主圍皖之議推公首功

加太子太保銜并騎都尉世職桐城廬江舒城賊聞奪氣以次攻下之而孝感德安黃州各郡縣賊亦先後擒斬楚境旋清而公則嘔血不止病不可爲已

文宗顯皇帝凶問至公自以受

恩深而信任專追慕沈摯拊心悲泣病益劇遂於八月二十  
六日薨於武昌節署遺疏入奉

上諭胡林翼秉性忠直操守廉潔在軍營九年賞罰嚴明  
知人善任克復武昌及沿江郡縣肅清楚境并調遣官  
軍攻復江西九江軍威丕振所向克捷本年八月克復  
安慶省城朕念其公忠體國懋著勳勞方冀長資倚畀  
乃以積勞成疾甫經賞假遽聞溘逝實深悼惜胡林翼  
著追贈總督卽照總督例賜卹并入祀賢良祠湖北省  
及湖南原籍建立專祠伊子胡子胡子勛俟及歲時由吏部  
帶領引見以示朕褒獎蓋臣至意

十一月十四日復奉

上諭胡林翼戮力疆場勛勞懋著據曾國藩奏陳自擢鄂撫數載以來恢復本境援勦鄰氛整軍經武以死勤事綜其生平允宜亟予褒揚著卽宣付史館以光簡冊胡林翼之子胡子勛著賞給舉人準其一體會試以示朕篤念蓋臣至意同治元年二月復奉

旨賜祭一壇予謚文忠公狀貌英偉目嚴嚴有威棱懾人聽強敏給事至應機立斷無有畱難苟當理艱煩重大毅然自任不以例文拘束自言守鎮遠黎平諸劇郡捕治盜賊爲民興利除害皆默自程課惟恐大吏

聞有所牽掣清釐湖北漕糧議者以州縣公私取給積弊且二百年不宜驟革公手自擘畫釐定以部定漕折爲率因其地之肥磽缺之繁簡加輕重焉歲爲民間省錢百四十餘萬緒爲庫項增銀四十餘萬兩提存節省銀三十餘萬兩民與國兩利而爲州縣裁革陋規幾盡使有以自給故亦無怨者籌辦鹽課釐稅皆自定章程所派員紳各視才地所宜時加手書訓戒綜覈名實精力絕人每戒飭屬吏以知稼穡之艱難知小民之情僞又曰不侮鰥寡不畏強禦時時念此可以消除貪鄙增長志氣其治軍務明紀律爲

鄂軍營制一卷頒行之尤加意將才曰爲統將必明大體知進退緩急機宜其次知陣法臨敵決勝又其次勇敢此大小之分也又曰兵之器者無不能將之貪者無不怯觀其將知其兵觀其兵亦知其將生平以天下爲已任語時事艱難慷慨自誓明於天下大計乘機赴會斷行無疑援江西數千人援湖南萬人皆精兵時鄂中賊方逼餉且缺公一意調遣軍糧皆自任之卒收全功武昌始復卽規取九江九江復又規取安慶越境千餘里討賊制其死命圍九江賊由江由皖犯鄂者三圍安慶賊由皖由江由豫全力犯

鄂州縣城陷者十餘公屹不爲動或遣將分援或躬親督勦從容肆應權其輕重算無遺策其於一省之事務大小各軍強弱以及鄰省之優劣高下燭照數計洞然於心人見公亦莫不輸心納服吐情實無敢遜飾而尤汲汲以講拔人才爲事屬吏一技之長一行之善隨登薦牘手書褒美以寵異之士有志節才名潛伏不仕千里招致務盡其用又密薦忠亮宏濟之才十有六人今多任封疆與開藩者嘗言國之需才猶魚之需水鳥之需林人之需氣草木之需土得之則生不得則死才者無求於天下天下當自求之

故公所特薦十餘人中不盡相識也在武昌專意吏事懲貪惡任廉能吏治蒸蒸日上病急時猶引賢退不肖數人時論皆以爲允公自爲湖北巡撫念國家多難而身負重任刻自砥礪益務繩檢其身較其尺寸毫釐而待人一秉大公推誠相與無粉飾周旋嘗謂人曰吾於當世賢者可謂傾心以事矣而人終樂從曾公其至誠出於天性感人深故也然諸將弁在事者樂公之鼓舞振興天下士從公爲尤盛而其言不自足如此立寶善堂武昌城以延賢俊之至者察其材德隨宜任使與人言虛中翕受言或未當莞爾



置之苟可行必研窮其利害而竭盡其底蘊卽有抵  
牾亦無芥蒂事有不順憤怒作氣左右以一二語解  
之卽時消釋和顏下氣委已以從與所常共事文武  
諸公厯六七年之久披肝瀝膽無幾微閒隔而遇事  
諮商必務發摠胸臆而後已其自視欬然常若有不  
足者語及人才優劣喟然曰世有伯樂而後有千里  
馬顧吾才智不足有爲賢者終不我應耳繫心

朝廷常至感念流涕庚申秋都城戒嚴急謀入衛會和  
議成

詔止其行

文宗皇帝升遐寢在熱河

哀詔久未下公憂思旁皇中夜扶病起立仰視曰京師必有事故病因是加篤然猶終日危坐考求兵事吏事之要汲汲施行顧左右歎曰聞道苦晚今雖稍有所見而不及行者多矣故曾公奏上死事狀以爲其克復諸城堅持之力調和諸將之功綜覈之才皆臣所不逮而尤服其進德之猛嗚乎此豈今之人也哉公生於嘉慶十七年壬申歲六月初五日年五十夫人陶氏故太子少保兩江總督文毅公之女無子以從弟渠翼子子勛爲嗣所著讀史兵畧若干卷奏疏若干

卷尺牘若干卷詩古文集若干卷家故有田數百畝  
自筮仕貴州誓先人墓不以官俸自益至是位巡撫  
將兵十年於家無尺寸之積詹事公會著弟子箴言  
行世公承其志爲箴言書院規模皆所手定悉以家  
所藏書納其中使人知務實學而推見諸行事然於  
書院終未見逮也嘗笑曰吾不幸死諸君賻吾者惟  
助修箴言書院無贍吾家於是協揆曾公中丞李公  
用公遺言爲積資修之夫人陶氏又以賻贈之入建  
胡氏家學以教其族之子弟而公故舊親戚仰給於  
公者歲常數十家無遺惠焉初林文忠公督兩湖設

豐儲倉武昌後歲祲賴其穀以食飢民自頃十餘年  
歲豐米益賤民家多無儲蓄公心憂之乃修復林文  
忠遺蹟勸民捐輸積穀十五萬石有奇又推行之襄  
陽荊州黃州使饑饉有備公薨數月湖湘閒穀大歉  
石錢數千官民皆憂乏食而後知公之爲慮深長也  
亦見公於事巨細具有先幾云

胡文忠公遺集卷一

長沙鄭敦謹

湘鄉曾國荃

編輯

恭謝 天恩並附陳楚北吏治兵政疏 咸豐五

年三月二十七日

臣於二月初十日沌口行營接準督臣前撫臣飭知

正月十三日內閣奉 上諭湖北布政使著胡林

翼補授欽此兼準札飭以北岸帶勇防勦乏員接替

其藩司一缺另委鹽道常恩兼署當卽恭設香案叩

謝 天恩因道途梗塞尙未專摺賚 奏三月二

十四日準督

臣

咨開三月初三日內閣奉

上諭

湖北巡撫著胡林翼署理欽此聞

命之下感悚

難名卽於武昌營次望

闕謝

恩接辦巡撫事

宜伏思兵勇之冗雜不精則軍餉之支絀彌甚連年以來楚北之患怯弁猾卒習慣潰走聞警尙且先逃臨陣安能致果懲前毖後之計首在練兵明恥教戰之方貴先選將被賊蹂躪州縣懸缺待人兼攝承乏刑罰不當其罪而狼莠日多恩惠未及於人而士民不信吏治之與兵事固始終相因者也凡此應辦之事惟當激勵士卒迅圖克復武漢卽當次第舉行容

與督

臣

虛心實力和衷商辦以期稍報

鴻恩於

萬

添募水陸二軍分布南北岸剋期進剿疏

三月

二十七日

臣於正月帶領練勇千八百人從九江回軍奉檄渡

江攻剿賊匪嗣因省城失守由沌口赶回與水師共

守金口業經荊州將軍官文督臣楊需先後馳奏

在案三月二十四日

臣

於武昌營次接準督臣咨開

三月初三日奉

上諭此時楚省賊勢南北蔓延

幾無著手官文等分辦合辦同係一事大江以北朕統

以責之楊需荆州防守事宜卽責成官文布置南岸  
攻剿事宜責成胡林翼妥辦其如何互相援應迅圖  
肅清之處該將軍等務當熟計兼權亦不能自分畛  
域也所需兵餉本日復飭催四川山西陝西趕緊籌  
解並諭湖南酌量協濟金口兵勇口糧如此項銀兩  
到楚卽著該將軍等仍遵前旨分用等因欽此仰見  
聖謨廣運訓示精詳臣維荆襄據東南之形勝  
而江漢又爲荆襄之咽喉自正月初七日賊踞漢陽  
而北岸已形梗塞自二月十七日武昌復失而南岸  
又已蔓延此時之計惟當急攻武漢乃可內固荆襄



武漢速復則南岸之崇通興冶等處次第可以肅清  
惟是鄂省素稱澤國非舟師得力不能力遏賊鋒上  
年十二月水師之輕便舢板百餘隻水勇千餘人陷  
入江西內湖其泊外江者兩次被襲復遭風擊損急  
回武漢以資修理而兩月以來三次被風損壞湖南  
紳局添造新船百餘隻復經署臬司李孟羣記名知  
府彭玉麟招集水勇千餘於三月中旬陸續趕到金  
口船隻之大小相資水軍之氣象已振三月十五日  
經彭玉麟鮑超王明山等放舟巡哨駕馭甚利往來  
如飛即可水陸定期會剿此水師近日添募修整之

實在情形也臣之一軍迭次於漢陽進剿堅壘之下  
頗傷精銳而士氣尙可策勵三月十六日由金口進  
兵石嘴十八二十二等日督隊直逼武昌賊壘殺賊  
各三四十名而總未大加懲創臣於到鄂之始卽遣  
舊用哨官前往湖南添募新勇二千餘名又經湖南  
撫臣檄飭守備譚瓊林帶勇六百名援鄂均於三月  
二十四日二十五日到金口會齊由臣調驗察看尙  
屬精壯臣思賊踞武昌於城外增修牆壕安置鎗礮  
其循江岸一路尤爲賊所專注若僅由一路進攻難  
期得力已密飭守備譚瓊林哨官滕正茂等帶領二

千人由金口紙坊驛路會期以攻武昌之背臣卽率  
所部循江岸以攻武昌之南面與水師會合夾攻此  
臣所籌南岸陸軍防剿之實在情形也副將王國才  
等從九江回軍近已添造軍械一律修整因思漢陽  
循江一路可以上通沔陽荊州若全軍集於武昌城  
外專顧南岸則漢陽之賊必更滋蔓難圖臣卽飭王  
國才等渡江進紮軍山遏賊上竄之路三月二十四  
日進屯沌口沌口山勢微高可蔽風濤舟師卽依以  
爲營約期會剿水陸并進如果一處得手仍可并力  
合攻此又北岸分布陸軍之實在情形也至西安將

軍扎拉芬署提督訥欽所帶兵勇尙未準咨會行抵何處如能迅抵蔡店步步爲營以攻漢陽之西則賊勢旣分可期得力臣等各營雖口糧缺乏然斷不敢因此稽延坐廢日時惟當激勵士卒剋日會剿以期上慰聖懷

硃批覽奏分南北進攻并防旁竄布置尙合機宜總以實力堵剿以分賊勢爲要 四月十九日奉

再臣等各營口糧二月分尙未拔清臣正月內從九江回軍其時江西餉項未到舟次糧臺已空勢難待餉而後起程抵鄂以後駐兵沌口金日軍士飢疲均

形匱乏刻下荊州湖南陸續解到餉銀分給臣營及

水師北岸兩軍實屬不敷支放查前奉諭旨飭

四川撥銀十萬兩解濟湖北軍營茲查四川總督來

咨已起解銀二萬兩尙無入境日期其餘八萬兩咨

稱不敷之項同皖省兵餉委實無項籌解等因臣查

四川鹽稅近年較旺地方本屬完善合無似懇

皇上天恩俯念湖北軍餉萬分支絀敕下四川總督

仍遵前旨續撥銀八萬兩分四月五月兩次起

解由荊州入境以濟武漢兵食其奉旨飭撥山

西陝西餉銀查北岸一軍兵糈尤關緊要應卽專濟

襄陽德安等處北路兵食又查江西未解湖北軍餉  
四萬兩準撫臣陳啟邁來咨已在九江撥付塔齊布  
大營銀二萬兩仍起解銀二萬兩由湖南轉運計日  
當已到楚應請旨敕下湖南江西撫臣各再撥  
銀四萬兩於四月五月分兩次批解庶幾兵勇之前  
欠可清而後餉不匱再水陸兵勇支應浩繁臣等各  
營並無糧臺委員查有現署荆宜施道揀發知府莊  
受祺辦事精詳廉正不欺堪以委司總辦後路糧臺  
事宜除檄飭知照外謹附片具奏

硃批戶部查覈速奏

陳奏水陸二軍連旬進剿情形疏 四月廿一日

竊臣

於三月二十七日在石嘴營次將添募水陸各

勇剋期會剿情形由驛馳

奏在案臣南岸一軍距

武昌賊營不遠其北岸副將王國才一軍亦擬步步

爲營直逼城下三月三十日副將王國才副將銜參

將恆泰等自沌口移進漢陽朝關并約會記名知府

彭玉麟帶領礮船沿江轟擊攻至鮎魚套口燒燬賊

船數隻王國才甫築營壘而漢陽之賊數千人直犯

朝關王國才恆泰等督勇擊退乘勝跟追殺賊數十

名焚燬賊營一座該逆退踞於漢陽西門外堅壘中

排列大礮以死拒守參將恆泰欲乘勢攻破賊營躍馬大呼身先士卒該逆乃從營後民房擁出二千餘人襲我後隊恆泰奮勇衝突斃賊極多漢陽裏湖藏匿賊划同時登岸襲擊我軍恆泰三面受敵力戰陣亡兵勇且戰且退賊遂悉力追撲正當危急之時彭玉麟在鮎魚套督戰遙見北軍退卻卽督水師登岸彭玉麟張啟基等自鸚鵡洲截賊之尾鮑超王明山等自鸚鵡洲前衝賊之中該逆狡悍異常猶復抵死抗拒右營哨官劉連升首先砍倒騎馬賊目并獲其馬後營哨官王友章亦殺騎馬賊目一人賊眾始亂



維時署臬司李孟羣派游擊何越堽前來接應王國才亦下馬據地手刃退兵回軍夾擊數路之賊同時潰敗我軍奮力掩殺斬級三百十餘顆生擒僞師帥羅登才并長髮老賊三十四人立時正法其餘疊水淹斃之賊又二百餘人奪獲僞夏官右副丞相餘逆大黃旗一面并鎗礮刀矛號衣二百餘件此三十日北岸陸軍先勝後敗水軍登岸截殺轉敗爲勝之實在情形也查水師向不登岸知府彭玉麟因見北岸賊勢猖獗恐大有損失致誤全局變計從權保全之功甚大協和之誼亦甚可嘉臣復查朝關地勢無險

可守仍令王國才駐紮沌口老營相機再進而臣急  
攻武昌以分其勢先令守備譚瓊林等帶領千餘人  
自李家橋驛路進攻武昌之右臂臣自率江岸各營  
循江隄分三路進攻賊營四月初二日督兵前進該  
逆先以悍賊伏於街外民房欲待我軍深入而襲其  
後臣派黔勇哨長姜映等六百人堅立後隊以備之  
派記名把總余玉興軍功王恆丁銳義等力攻白沙  
洲賊營殺賊五十餘名該逆果由兩路分撲臣中路  
一軍堅立不動其隄外勇目復從沿江兩路并力衝  
殺斃賊九十餘名生擒偽司馬張亞潰黎允功偽旅

帥趙黑二等八名奪獲賊械七十餘件賊眾奔潰是日李家橋一軍同時進攻人數本單未能得手水師攻至城邊賊伏不出亦未得手此初二日臣軍及水師接仗之實在情形也伏查鄂爲澤國必賴水師而水師情形江與海異江水急而海水平故海之利用在巨艦必藉順風以壓賊江之利用在小舟從上擊下又必藉逆風以挽水勢否則舟行太速開礮無準收隊甚難臣於初五初六等日約期進戰水師以南風甚狂進易退難不能出隊初九日臣復督軍前進見八步街左右賊幟如林較前多至數倍我軍將近

賊巢伏賊盡出悉銳與中路一軍拚死鏖戰署湘潭  
守備千總劉凝俊獨立陣前手刃三賊被羣賊矛刺  
陣亡同時軍士陣亡者二十餘人一軍皆驚洶洶欲  
動記名把總余玉興軍功丁銳義記名把總吳璘等  
先經臣派由江岸隄左而進見賊攢聚於中路恐我  
軍勢必不支亦恐臣爲賊窘卽率外委楊琢珩等由  
隄外鳧水來援水幾沒頂馳至中路直衝賊隊有黃  
衣騎馬賊目最爲兇悍被軍功周玉成等躍至馬前  
戳死二賊餘賊敗潰我軍合力掩殺斃賊七十餘名  
是日之未致挫敗則記名把總余玉興外委楊琢珩

等之力也水師是日出隊以東南風太緊旋即收軍  
及十二日早開北風大作飛飭水陸各軍合力出隊  
王國才出攻漢陽賊匿不出彭玉麟以武昌之下塘  
角所泊賊船爲其老巢必由鮎魚套小河口兩處直  
下塘角焚奪賊船則賊失所恃而鮎魚套等處乃可  
得手卽率右營守備銜張榮貴衝冒鎗礮直下塘角  
而以鮑超張啟基截小河口之賊船劉培元王明山  
截鮎魚套之賊船何越斑段康侯爲後隊接應彭玉  
麟攻至塘角其左營守備孫昌凱右營守備銜儘先  
千總張榮貴首先撲近賊船擲放火毬火箭計燒賊

船二百餘號燒斃淹斃賊匪四百餘人守備鮑超見有賊船逃往下游卽會同會秉忠帶舢板三十餘隻乘勝追至青山地方不料日方及午南風陡轉急欲收隊回營而水勇逆流搖槳精力漸疲急難上駛賊於小河口開出快蟹數隻攔江橫截彭玉麟等見下游危急卽與張榮貴悉力救援而武漢兩城之下賊礮齊發我水師以江心溜急必須傍岸而行遂致中礮子傷者每船六七人之多而弁勇裹創力戰無不一以當十守備會秉忠額受礮子二傷守備銜張榮貴身帶五傷兩足踝均中礮子猶能裹傷力戰坐於

船頭手然大礮是以眾心愈奮往來於礮聲如雷礮  
子如雨之中銜貫而前衝出重圍計被賊礮擊壞舢  
板十餘隻弁勇陣亡二十餘人受傷一百餘人現在  
趕緊醫調必使士氣振興即可決期再戰臣軍是日  
自辰至申攻剿四時之久弁勇奮力攻撲擊破賊營  
一座殺賊七十餘名祇緣隄路窄狹隄外積水沮洳  
我軍行陣能密而不能疏午刻以後水師及漢陽一  
軍漸次收隊李家橋所派一軍進戰不利該逆遂并  
力注於武昌江隄一路臣營兵力本不甚厚六成出  
隊力戰四時遂續調畱營四成更番迭進直至二更

賊始敗退統計陣殺生擒一百六十餘名查訊犯供  
僞將軍羅逆僞總制黃逆是日均經轟斃而我勇之  
力戰受刀矛面傷者亦四十餘名陣亡十一名此初  
九十二日水陸力戰之實在情形也查探賊匪近又  
掘斷城前大路添築土城以阻我軍其派往李家橋  
分兵進剿者因僅止勇目管帶遂添調揀發參將扎  
勒罕助剿亦尙未能得手連旬進戰水陸弁勇儘有  
出力之人急宜簡拔使勇怯分明則士氣可期奮勉  
惟一軍絕少文武官員副將王國才參將扎勒罕之  
軍勁旅無多汰之則兵力更弱畱之則決戰頗難且



漢陽江岸甚關緊要勢難將王國才調歸南岸轉恐北岸空虛至漢陽之蔡家嶺黃陵磯等處武昌之李家橋紙坊金口等處均係前後要隘逆賊必爭之地現已各分兵千數百人防剿惟一軍已分數路而管帶無人僅止哨弁勇目誠恐約束未能嚴明而急切又無篤實可靠能當一面之才五中焦灼莫可名言惟聞督臣已帶北路勁兵陸續行抵隨州唐縣鎮等處倘能迅由楊店蔡店直搗漢陽約會臣營同時進攻更當得力蔡店尤賊匪糧餉必由之路更當速撥重兵且戰且守乃爲周匝至荊州將軍所派李光榮

等前已行抵仙桃鎮如能進攻漢陽臣再察核檄調會同商辦所有三十日力戰陣亡之副將銜參將恆泰初九日力戰陣亡之署湘潭守備千總劉凝俊均係帶隊衝鋒身先士卒忠勇特出實堪憫惜仰懇

皇上天恩敕部照升銜署銜從優賜卹其餘陣亡弁勇容臣查明咨部請卹

硃批知道了恆泰等均著從優議卹該部知道

再臣等陸軍因分撥各路防剿不敷調遣經臣與副將王國才等添募陸勇五千人月需餉銀四萬五千兩而長夫之工食戰陣之卹賞軍械之修補尙不在

此數內水師精卒現在江西內湖二月三月從湖南  
添募而來人數既倍於昔又兼湖南撫臣奏調回

籍養傷之副將楊載福招募舊年部曲擬令一併來  
鄂據水師糧臺知府厲雲官稟稱水師一軍每月約  
須餉銀四萬兩刻下湖南所解銀錢并江西之二萬  
兩四川之二萬兩合計水陸僅分數二月之餉三月  
初旬尙未請領計水陸缺餉已逾四十餘日臣於三  
月二十七日奏請敕下四川於四月五月續  
撥八萬兩湖南江西四月五月各續撥四萬兩專運  
金口糧臺尙未奉到諭旨之先蒙皇上恩

諭飭令陝西山西四川月解五萬兩查秦晉之餉已  
解到者均歸北岸督臣楊需支用川餉可由荊州下  
運金口聞督臣楊需亦擬截畱現駐武漢兵勇匱乏  
尤甚水師將士船礮利器專爲東征金陵而設本非  
湖北本籍兵勇且除此一軍亦別無水師可用任其  
飢潰臣罪更大惟有籲懇 皇上天恩敕下四川

省於前遵

諭旨已撥之外續撥銀十萬兩分三

次批解專濟武漢水陸兵食

臣

明知度支告匱何敢

徒殷呼籲上瀆

聖聰亦明知各省均非寬裕之

境然較之鄂省緩急安危情形迥異兼以前項餉銀

先經督臣楊需截留以濟北軍臣等各營實屬萬分窘迫惟激勵將士斷不敢以無餉遷延并擬隨時隨地分遣委員紳士極力勸捐以濟要需所有懇恩敕下專撥餉項緣由理合附片奏聞

硃批戶部迅速查明具奏隨時勸捐實爲救急良策惟在辦理得人耳五月十三日奉

攻勦武漢得獲勝仗疏五月十三日

竊臣於四月二十一日將南北兩岸連旬進勦情形由驛奏聞在案旋卽知會臬司李孟羣副將王國才兵勇於二十二日二十四日大隊齊進城閉匿堅

古方略卷一  
壘之中我軍誘戰終日該逆僅於牆隙施放鎗礮以死拒守二十六日寅刻水師得風約會兩岸陸師大隊齊發一攻鮎魚套賊舟一攻漢陽賊舟自辰至午排礮轟擊賊以戰艦橫截鮎魚套口及漢陽河口我師從江外攻之斃賊五十餘名水勇亦被礮傷陣亡二名帶傷十餘名以賊舟堅守不動未能乘勢衝入副將王國才游擊周祿進攻漢陽西門進兵之始賊壘中寂不聞聲王國才知賊計詭譎嚴飭兵勇毋許輕進俄頃之間賊礮齊發伏賊盡出王國才佯卻以誘之於賊營三里之外民房牆穴預安木礮迫賊追

至相離丈許自然引綫轟斃騎馬賊目二名餘賊一  
百十餘名兵勇折轉追殺斬擒甚多臣於是日督隊  
力攻南岸賊營分兵三路派定營分責成各攻一壘  
千總何紹彩周得魁州同銜伍典各帶奮勇力攻江  
邊白沙洲各營其黔勇恆勇寶勇安勇分攻江隄八  
步街各營該弁等知賊營牆壕高深預選壯士各持  
斧鋤掘濠拔籤直逼其壘賊營鎗礮密如雨點其攻  
打江邊各勇中傷三十餘名仍能堅立不動其攻打  
江隄各勇始則攻撲甚猛同時中傷五十一名創甚  
稍卻又因扶掖帶傷勇士隊伍雜亂賊遂悉銳乘之

適水師記名知府彭玉麟遙見中路勢將不支卽飭江邊陸師趕回橫截而自率水勇大呼助勢何紹彩周得魁伍典三營遂飛馳四里前來援應由隄下湖蕩鳧水衝上者數百人水均沒頂其大隊又繞上三里涉淺橫衝將追賊三百餘名截殺後路賊數千已被橫截中分爲二遂先行奔潰惟時援兵已上隄岸而隄岸之勇目亦督隊回殺四面圍住前路衝鋒悍賊無一得脫者計殺騎馬黃衣賊自五人首級二百三十一顆竄入隄壩湖內復被矛戳四十餘名生擒僞總制衛大瀆等二十六名訊據僞將軍黃至二僞



十八軍檢點羅亞羊均已陣斬奪賊馬五匹設賊  
馬七匹大黃旗二十七面刀矛鎗礮二百六十八件  
外委安定國李仕喜譚得亮向德明等首先領旗衝  
殺而大隊隨之轉敗爲勝膽力可嘉向德明身受六  
傷獨殺五賊舉旗四桿尤屬勇往業經臣分別記名  
獎拔其打仗不能出力者亦於三月內外查實淘汰  
五百餘名以示旌別二十七八五月初二初六  
等日水陸均出隊力攻或以數十人誘之或以大隊  
逼之賊終不出惟每次攻其堅壘逆賊穴牆安礮排  
列數層外濠三道釘籤亦數層勇往之士拔籤踰溝

必致帶傷數名臣細察賊形并非畏避不出必另以  
奸謀困人恃其牆濠堅深險阻難踰使我各營勇士  
日日攻堅暗受礮傷而轉於兵力不到之處旁軼滋  
擾深堪痛恨前得督臣賁陽營次來函稱西安將軍  
力戰二日陣亡他路兵勇先行退走不知救援尤深  
憂憤大將歿於營陣軍氣不揚德安一帶賊氛尙惡  
可否懇請 天恩迅催提督塔齊布提督孔廣順

進兵援楚庶大江南北可以速復而江西湖北水軍  
不爲賊所中梗至荊州將軍所派守備穆租索朗同  
知李光榮督臣所派李保邦新募湖南南勇在沔陽

勦賊得勝惟沔漢是上窺荆襄要路兼可繞出水師  
之後臣擬簡派精卒委臬司管帶渡江協勦容與臬  
司挑選籌議再爲馳奏

再臣力攻武昌一月有餘近日賊更閉匿不出知其  
必有奸謀臣初九日繕摺尙未拜發是日午刻適有  
投誠降賊探知賊計堅守不戰於初七八等日潛啟  
東門夜出大股迂道上竄夜行晝伏并探定於初十  
日陰襲金口以斷水陸餉道臣之一軍兵力不厚金  
口僅止守護勇丁數百名分防紙坊兵勇亦僅止一  
千二百名勢恐不支萬一賊匪竄踞則後路糧餉軍

火必致斷絕又因北岸亦關緊要業已續派千二百名渡江協勦兵力難以再分臣卽日未刻親提各勇飛馳金口紮營未畢而紙坊兵勇千二百名於初九日三更被賊圍攻力戰一夜初十日辰刻業已潰散初十日午刻賊之全隊直犯金口分五路前來攻撲臣軍預分三路埋伏以待而以三路接戰千總何紹彩周得魁余玉興州同銜伍典等各率百十人誘賊而以大隊旋轉繞之殺賊一百八十餘名生擒十七名逼溺內湖淹斃者約二百名奪馬十七匹殺倒二十一匹奪器械二百餘件戰至黃昏數路之賊均經

敗退我軍亦收隊仍修牆壘以待決戰并據水師記  
名知府彭玉麟都司鮑超張啟基等稟稱是日下游  
又有另股賊循江上竄戰船卽過江轟擊各用舢板  
排礮攻之如是數次斃賊甚多自午至申賊敗下走  
復排礮追擊轟斃賊匪多名十一日辰刻賊復分四  
路而來遙見樹林中埋伏尤多臣飭各營登高審視  
按兵不動專派長字營六百人深入誘之賊果大至  
伏賊亦起我軍仍分六路以應之千總何紹彩周得  
魁州同銜伍典軍功丁銳義等各率練勇分途剿殺  
何紹彩等從中路又分二枝行陣旣疏得以施展乘

勢搏戰並未施放鎗礮專以長矛交鋒賊眾大敗陣  
斬二百一十三級溺斃約百人生擒僞總制陳立正  
等十六名訊係桂平老賊即時正法奪獲旗幟鎗礮  
刀矛共一百九十餘件維時革山蛇行而進者尙有  
千餘賊匪署臬司李孟羣從舟中哨樓覘之卽飭水  
師游擊何越斑率前營水勇登岸擊賊署臬司李孟  
羣身自督陣斬擒百餘名并獲長髮老賊三名各路  
之賊同時皆潰賊計欲抄襲官軍之後而水陸預探  
得知并力以乘之水陸四戰通計擒斬七百餘名雜  
髮逃散者約千餘人

卽當督飭各營實力攻剿至

紙坊潰散兵勇容俟查明實在臨陣帶傷及脆力尙有可取者準其收用其餘八九百名一併裁汰以示區別謹將初十十一日水陸剿辦情形附片奏聞

上諭胡林翼奏武昌連次獲勝情形各摺片覽所奏軍情武漢賊勢尙形猖獗該署撫所帶兵勇旣嫌單薄自未便再行分撥摺內所稱擬選派精卒委臬司管帶渡江協剿係恐賊由漢沔上窺荆襄繞出水師後路但此時隨州已復沔陽一帶賊匪亦經擊退孔廣順所帶官兵已由棗陽一路進剿德安西浚阿所統官軍不日可出

豫境當可過賊上竄若李孟羣再帶兵渡江恐該署撫  
兵力愈單金口一帶不能堵截轉致該逆沿江上竄未  
爲得計所稱擬令李孟羣挑選兵勇管帶渡江之處仍  
著該署撫酌量緩急相機辦理塔齊布現在九江未能  
卽時攻克萬不能分身來楚致賊肆行出江孔廣順進  
攻北岸必須將德安之賊埽除方能進擣漢陽該署撫  
惟當就現有兵力速籌剿辦如江北肅清西淩阿等自  
能進兵與南岸夾擊也潰敗兵勇隨時裁汰所辦甚是  
第所裁之數至一千三四百名應如何添補助剿並著  
妥籌辦理昨據御史張駿奏請實行團練以節糜費等



詔並著該署撫飭屬妥辦如湖北黃州河陽等處鄉團  
頗能得力而河南各屬卽藉鄉團爲名抗糧滋事總在  
體察民情慎選牧令固不得視爲具文亦不可拘泥成  
法原摺著抄給閱看將此由六百里諭令知之欽此六  
月初八日奉軍機字寄

上諭

著胡林翼嚴飭水陸各營實力進剿務將武漢分踞  
之賊殲除淨盡迅圖克復勿稍遲延欽此 同日接奉

官軍大獲勝仗疏 五月二十九日

竊臣 於五月十三日將南北兩岸連旬開仗獲勝并  
賊匪迂道上竄 臣 親提各勇兩次剿辦大勝各情形

由驛馳

奏在案

臣於拜摺後當卽分派精幹勇丁

赴各路嚴密偵探并知會署臬司李孟羣副將王國

才水陸乘勝設法進攻賊於十五日黎明大股分六

路而來旗幟如林彌山彌谷

臣登望樓審視該匪離

臣營僅四五里許每路約一二千人

臣預派千總周

得魁記功把總余玉興帶道州寶慶勇丁千二百人

在營右路三里許埋伏又派從九銜丁銳義千總何

紹彩州同銜伍典各帶楚勇在營左路二里許埋伏

復遣壯勇數百名誘之賊之大股果分六路蜂擁前

撲

臣

猶按兵不動迫賊勢漸近始督飭大隊分四路

而進奮勇迎勦該匪拚死相拒約一時之久我軍僅  
用刀矛交鋒連斃執大黃旗悍賊數名騎馬賊目四  
名殲斃賊匪百餘名賊卽退卻我軍益加奮力乘勢  
爭先二路伏兵同時亦分數路抄襲賊尾各路之賊  
均行奔潰殲斃黃帽黃衣賊目九名殺斃五百餘名  
生擒三百三十餘名投內湖淹斃者約二百餘人並  
生擒僞平湖丞相陳大爲僞指揮伍正何亞喜等三  
名立時正法其循江竄下者經署臬司李孟羣知府  
彭玉麟於賊匪大至時已準備礮船過江令水勇預  
先登岸埋伏賊果一股由江岸潰退我軍伏兵四起

撲出截擊殺斃賊匪一百二十餘名生擒十二名逼  
入大江淹斃者約二百餘名臣卽督飭各勇乘勝追  
剿沿途殲匪約百餘名我軍自辰至申追剿三十里  
軍士已飢始行紮營造飯十六日四鼓探聞賊之敗  
回者仍住紙坊臣卽飭大隊逕赴紙坊該匪堅閉不  
出踞營抵敵我軍奮力爭先乘南風大起施放鎗礮  
火箭火罐力戰移時賊乃大潰連塌賊營二座殲斃  
甚多餘匪分二股逃竄一上竄山坡一下竄城中臣  
卽派周得魁何紹彩等帶勇丁千餘名追赴搜剿又  
派丁銳義伍典等帶領大隊趁勢追剿賊狂奔入城

城門已閉我軍直逼武昌小東門城上鎗礮如雨點  
軍士仰攻殊難得手時已酉刻臣度軍力稍疲又兼  
城外濠溝寬逾數丈兵力尙單難以圍攻卽飭前營  
離武昌十餘里暫行駐紮并飭各營暫駐紙坊金口  
以爲犄角之勢計連戰二日共殲斃賊匪并生擒淹  
斃及剃髮解散者不下三千餘名我軍陣亡帶傷者  
僅止六名此皆仰仗 天威三戰三捷賊膽已寒  
軍氣倍壯查生擒各犯內有二百九十餘名訊明被  
擄僅止旬日蓄髮未深且臨陣均係棄械伏地又陸  
續剃髮投營懇請回籍者千餘名實係被擄同行並

非甘心從逆應卽貸其一死并酌給米糧三升準其  
閩籍惟是逆匪詭譎異常其上竄之賊尤恐勾結崇  
通餘匪必應卽時搜捕除飛咨岳州加意嚴防并派  
水陸弁勇星速入湖雕剿臣於十七日仍駐金口老  
營趕緊會商署臬司李孟羣副將王國才記名知府  
彭玉麟等俟上游竄匪雕剿事竣卽行并力進攻以  
期克復武漢仰慰聖懷再查臣營本無將備大

員僅止哨弁勇目隨營效力自上年進剿通城崇陽  
興國九江湖口所帶舊勇迭戰十餘次均經隨案稟  
商督臣楊需侍郎臣曾國藩及提臣塔齊布因九江

未復尙進保 奏自援鄂以來大小二十餘仗雖未  
大勝尙能穩紮力戰不致潰走四月二十六日五  
月初十一十五十六等日迭獲大勝軍氣已振可  
否懇請 皇上天恩俯念連月力戰先行獎勵以

勸後來茲特擇尤保 奏三十一名其迭次察看

能出力者 臣已陸續汰去一千餘名卽勇怯爲勸懲

當可得力除另繕清單外謹將賊蹤上竄繞出 臣後

飛馳勦辦大獲勝仗情形理合由驛六百里馳 奏

再 臣於初九日午刻探實賊匪潛出大股迂道陰襲

後路 臣營前已分布兩岸實無兵力可以再分未刻

拔營不及半日賊果大至力戰三日敗賊四散迅卽  
揀派陸勇會同水師入湖搜剿并派湖南來援之守  
備譙瓊林回防六溪口及岳州等處江路要隘仍恐  
逆賊勾結崇通土匪餘燼復燃一面飛飭岳州加意  
偵探防範臣現駐金口已退離袁家河三十八里之  
遠雖竄匪有應追之勢而臣營無再退之理當俟援  
剿上游兵勇回營仍迅卽進圖武漢惟是武漢形勢  
外江內湖進剿情形頗多阻隔如北路兵勇迅速前  
來分途進攻自易克復惟溽暑之時澤國沮洳北來  
兵勇水土能否服習尙難遙揣且北路勁兵自當步



步爲營以次漸逼斷不可任其輕進失利有損

國威臣謹就武漢之大勢切實思議查去年前督臣

楊需將軍官文之兵勇均已進逼楊店蔡店軍山而

漢陽之後路已斷岳州屢勝之兵勇又分爲三大枝

以全力注於武昌賊畏提臣塔齊布之威不能堅守

而提臣塔齊布又繞出洪山乘其思遁而力剿之故

兵始到而賊卽敗竄又查二年提臣向榮以重兵數

萬分布武昌各門而全力扼守洪山賊卽遁竄是進

兵武昌固必以洪山爲扼要矣武昌城周二十里城

門凡九臣之兵力攻其一而遺其八兩月以來遂日

攻堅迄未得手誠爲失算卽擬繞出洪山之下而尙  
恐兵力不敷糧路中斷使賊果出城抗拒尙可力戰  
以倖成功若再堅閉不出徒以礮石自守則攻具未  
備運道難通官兵將有坐困之勢此武昌一路之實  
在情形也至漢陽城外四面皆水騎兵步卒均阻沮  
洳賊又四面皆設陷阱環以溝壘防守倍嚴臣於正  
月二月僅帶勇循江隄一路進剿賊得專力抵禦於  
牆隙陜隘處施放大礮中傷勇士甚多故不得手先  
攻漢陽必須於潰口蔡店屯以北來重兵扼其險要  
深溝高壘不必交戰而賊之上犯襄河者來去之路

已斷臣卽當開濬江隄放水師入湖同陸兵力扼其  
西再能設法以水師橫出襄河之內則外江內河同  
時夾攻漢陽如能速復則鄂省之咽喉已通不難併  
力注於武昌蓋鄂省十府黃州居其下武昌居其南  
其餘八府皆以漢陽爲門戶稽之往牒治鄂者必以  
漢陽爲重亦形勢然也一俟追剿上游水陸各軍不  
日回營卽當咨商督臣迅將南勇義勇川兵之服習  
水土者先行前進更當審擇形勢所宜併力一處先  
其所急以期仰荅 聖主眷念南服之至意愚昧  
之見是否有當謹附片 奏陳

再臣前因兵餉不繼遴選委員紳士隨地勸捐業經  
奏明在案現在各處報捐銀數漸多除將願捐貢  
監並各職銜者即將部頒執照填給外所有指捐官  
職者自宜隨時奏請從優獎勵以昭激勸茲查賀  
曙初等報捐銀兩指捐各官均經臣查照籌餉事例  
減二成銀數核算有盈無絀理合附片奏懇  
皇上天恩俯念軍需緊要特予獎勵以期踴躍所有  
捐生銀兩及呈請各項官職另繕清單伏乞  
上聖鑒訓示

諭胡林翼奏南北兩岸剿賊連獲大勝請將出力人等

先行獎勵一摺 勦辦尙爲得手賊鋒已挫著胡林翼  
等乘此聲威督飭諸軍奮力攻勦以圖克復所有各營  
員弁兵勇連月以來屢次打仗出力自應先行獎勵以  
昭激勸 六月二十一日奉